



**Namminersorlutik Oqartussat tamakkiisumik piginnittuullutik aktiaateqarluni ingerlatseqatigiiffiini ataasiakkaani siulersuisunut ilaasortassanik toqqaasarnermi nunatsinni najugaqavissut amerlanerussuteqartut ilaasortaasalernissaannik Naalakkersuisut aalajangersagaliortut inatsisissamik UPA2017-imi saqqummiussassamik siunnersuusioqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Suka K. Frederiksen, Siumut)  
(Siullermeenera)

Politikerit suliassarinnigilaat sulliviit oqaluttuutissallugit siulersuisutik qanoq inuttalersussaneraat - aamma pineqaraluarpataluunniit sulliviit Namminersorlutik Oqartussanit tamakkiisumik pigineqartut.

Demokraatini isumaqarpugut, sullivimmik piginnittup soqutigisarissagaa piginnaaneqarnerpaanik siulersuisunut ilaasortaqaassalluni, immikkoortumik sulliviup inuutissarsiutigisassaani.

Manna siunnersuut aqutigalugu Siumut aalajangerniarpaa, ingerlatseqatigiiffinni siulersuisunut ilaasortat qassit Kalaallit Nunaanni najugaqassanersut. Demokraatini siunnersuut isumaqatiginngilarput. Tamatumunnga pissutaavoq isumaqaratta, ilinniarsimasat piginnaanerillu aalajangiisuusariaqartut kikkut sullivimmi siulersuisunut ilaasortaanissaannut. Ilinniarluarsimasut piginnaaneqarluartullu siulersuisuni ilaasortanngortissinnaagaanni - taava sulliviup iluatsitsilluarnissaa qaninnerussaaq. Sulliviit ingerlalluartut inuiaqatigiinnut tamanut iluaqutaapput.

Siunnersuut pissutaalluni Namminersorlutik Oqartussat piginnaaneqarnerpaanik siulersuisunngortitsinissaminnut periarfissaat mangiarneqassapput. Taamaattumik siunnersuut toqqaannartumik inuiaqatigiinnut inuiaqatigiillu aningaasarsiornerannut innarliisinnaavoq.

Demokraatini inassutigaarput siunnersuut itigartinneqassasoq.